

PROGRAMMA  
QVO  
RECTOR  
UNIVERSITATIS ROSTOCHIENSIS  
BERNHARDUS

Barnstorff,


Med. D. Prof. P. & Poliater

AD

VIGILIAS  
CIRCA IPSUM NATALEM  
DOMINI  
SALVATORIS NOSTRI  
JESU  
CHRISTI

justè pièq; celebrandas

*Omnes Omninò Cives Academicos, eâ quâ fas est  
humanitate, blandè invitat.*



Rostochii Typis JOH. WEPPLINGII, Univ. Typogr.






**I**qvô tempore præ-

ter diurnas meditationes fidei etiam vigiliis nocturnisque sacris pietatem exercere aut necessarium aut præ cæteris utile arbitramur, hoc sanè omnis lætitiæ festo, quod iterum nobis illuxit, idem præcipuè svadendum esse non sine causa videtur. Quænam enim nox unquam illustrior fuit, aut esse potuit,

qvàm qvâ exercitus ipse Angelorum cœlestis magnâ sui luce hominibus præsentia suæ significationem fecit sane illustrissimam? Exorta jam est ex cœlô lux omnis gratiæ, ne amplius esset, quod ex cœlô metuendum, sed ut erectô iterum capite sursum prospiciamus ad thronum omnis misericordiæ divinæ. In ipsâ nocte Dominus nasci voluit, ut significaret, nihil lucis, nihil boni penes homines jam post lapsum esse relictum, sed se unicum esse, qui noctis tenebras discutere & vellet & deberet & posset. Qvis non invigilaret jam rebus fidei suæ omni animæ propensione? Qvis non noctis etiam aliquâ partem conjungeret atque tribueret illis laudibus, quæ in gloriam DEI unâ cum Angelis sunt dicendæ? Disciplinam veterum si apud animum repetimus, non sine admiratione tot ipsorum antelucanos cœtus, tot vigiliis, quibus res sacras administrarunt, deprehendemus atque notabimus. Non preces, non sacra, quæ per dies statos fiebant, ita placebant, sicut illa omnia, quæ noctis vices sibi in religione Christianâ dividebant aut occupabant. Neque illæ religionis partes, quas sibi aliàs aut omnis hebdomas per diem, aut Sabbatum aut dies dominicus vindicabat, in eô honore habebantur, qvô sacra vigiliarum. Equidem si persecutiones, quibus miserrimè affligebantur initio Christiani, ad animum, eâ qvâ fas est recordatione, paulò altius mittimus, in tantâ Ethnicorum rabie neque locus nisi privatus, neque tem-





tempus nisi nocturnum, quamvis & id agere quidem, ipsorum conventibus concedebatur. Testimonium hujus rei afferant præter prudentem cujusque hominis conjecturam & Tertullianus & Plinius homo aliàs gentilis ad Imperatorem Trajanum. Remansit hæc vigiliarum cura apud Ecclesiam, etiam cum halcyonia ubique essent data. Major scilicet quemadmodum fidei cura persecutionis tempore Christianorum animum admodum sollicitum habebat, ita in subsequenter etiam hominum aetatem, ubi jam Tyrannorum furor deferbuisset, paria adhuc videbatur sui studia transtulisse. Inde sacris vacabant non tantum per dierum sacrorum spatium, sed noctis etiam excubias agebant in precibus, in lectione, in meditationibus animò quàm cupidissimò. Effecit deinde æmulatio illa, quâ Orthodoxi Arianis Constantinopoli cedere volebant, ut excubiis etiam precum in Ecclesiâ sætis peculiare Psalmi atque hymni in laudem Salvatoris nostri contra Arianos adjicerentur, sicut fidem hujus rei facit Sozomenus l. 8. c. 8. Et licet in magnâ illâ sive Paschali hebdomade potissimam videantur Christiani olim vigiliarum suarum rationem habuisse, ut preces inde lucernariæ, & Psalmi lucernares ipsumque officium lucernarium nomen suum in latinitate sanè novitium juxta Baronium acceperint, id tamen relinquitur præsentī festo, nullam noctis majorem sive venerationem sive lucem fuisse, quàm quâ ipse Filius DEI assumptâ carne in mundum venit. Hæc nox præ aliis vocatur sacrata & adhuc germanice *Weihnachten*: Hujus etiam feriæ non sine religione quâdam imperantur juxta Telesphorum Papam c. 48. de Consecr. dist. 1. *Nocte sanctâ Nativitatis DOMINI Salvatoris missas celebrent Presbyteri & hymnum Angelicum in illis solemner decantent, quoniam & eâdem nocte ab Angelò Pastoribus nunciatus est.* Cumque reliquæ vigiliæ sive ex remissione hominum pietate, sive ex prudentiâ quâdam, ne peccandi malis esset major licentia, sensim intermitterentur, aut tollerentur, hujus tamen festi vigiliæ omnium diutissi-



ma in Ecclesiâ obtinuerunt, & adhuc hodiè quibusdam in locis apud Pontificios obtinent. Neque sanè aliter, si rem ex virtute suâ metimur, omnibus agere omninò convenit. Quantis lætitiæ signis Cives non undiqve excipiunt diem aut noctem natalem Principis sui? Quantum collustrant noctis illius tenebras, cereis, facibus, atq; lampadibus undiqve accensis? Quàm occupati sunt in vigiliis, ne vel quicquàm officii sui desiderari posse existimaretur? At verò quid Principis mundi, nisi mortales nobiscum homines? Verùm jam Principem Cœli, æternum illum omnium rerum DOMINUM Hominem quondam per noctem factum esse sicut piè credimus, ita religiosissimè etiam hoc cum primis tempore idem recordari quàm æqvissimum est. Si ingenii vim in pietate occupare placet, si Sapientiæ amore quodam ducimur, si animum non vanâ lætitiâ perfundere gaudeamus, en hîc mysterium pietatis magnum! en infinitam gloriæ abyssum! en verum omnis lætitiæ fontem! DEUS HOMO factus est, & Homo DEUS! Quid magis captum humanum infinitis modis excedere posset? Quæ per omnem suam naturam à se quàm longissimè h.e. in infinitum usq; disjunguntur, ea accessione mirabili in unum aliquod sibi conjunctissimum, personam nempe unam, concurrunt. Qui, cum peccatum intervenisset tanquam vinculum sceleratè dissolvens, ita à se invicem recesserant, ut inimicitia utrinque esset posita, illorum natura etiam mutuum societatis vinculum jam in se recepit. Tam benignissimus Deus est, ut miseriæ nostræ, quæ non satis cogitari, nedum exprimi potest, misertus, ipse naturæ nostræ particeps fieri voluerit. Ipse à quo sunt omnia, etiam gratiæ omnis initium erga nos facere debuit, dum inutiles nos planè facti eramus & contrarii ad omnia. FILIUS ergò DEI, ut nos adoptaremur iterum filii, hominis etiam filius ita salutari voluit, ut verè quoq; talis esset. Non assumpsit aliquam modò speciem hominis, sed ipsam Carnem, ipsum sanguinem, nobis per omnia similis factus Hebr. II. 14. 17. Neque ita assumpsit, ut modò sustentaret  
rem



rem illam in suâ personâ, vel conservaret in statu unionis, in quô est, sed dum idem ille, qui Homo factus, Deus etiam verè appellatur Rom. IX. 5. Luc. I. 35., manifestum est, eandem personam, quæ divina est, æqualiter jam competere humanæ naturæ, ut pariter & illa sit jam de essentia personæ FILII DEI per assumptionis gratiam ipsi communicatæ. Cumque natura divina & λόγος non sit diversum aliquid ab ejus personâ, neque minus ipse DEUS in carne manifestatus esse dicatur Joh. I. 14. I. Tim. III. 16, intelligimus inde satis, & ipsam naturam CHRISTI divinam verè & immediatè esse humanæ conjunctam. Adeo verum est, DEUM esse Hominem, & Hominem esse DEUM! ille Homo factus est in Spiritum æternæ vitæ, sicut Adamus verè in Spiritum viventem I. Cor. XV. 45. Ita omnium, qui ex veritate sunt, confessione jam apertissimè constat, quis sit verus ille *Messias* Salvator omnium. Dum enim DEUS ipse in carne apparuit, ita justus declaratus est in Spiritu I. Tim. III. 16, ut in virtute operum, quæ tunc ipse edidit, testimonium Spiritus de se per prophetas testantis & habuerit & confirmaverit. Justum ergo h. e. verum & genuinum Messiam hominibus jamdudum natum esse, evincunt illa dicta satis firmiter per universam scripturam, quæ IESUM nostrum unum eundemque, & DEUM & Hominem esse prædicant. Jam judicent omnes, annon res hæc, annon gratia illa, quæ nobis contigit, die nocteque considerari quàm maximè mereatur? Ipsi Angeli, quibus tamen inde nihil commodi, in hoc Evangelii mysteriū velut inclinatio capite introspicere gestiunt I. Petr. I. v. 12. Quânto majori hinc sollicitudine, quàm propensiori animi voluntate non nos esse oportet? Annon beati collaudantur, qui neque nocte legis curam attentionemque intermittunt Psal. I. 2. ? Evigilemus ergo etiam ad illas jam pietatis vigilias, quibus FILIUM DEI tanquam fratrem & Consanguineum nostrum compellare licet? Non noctis amplius horrores metuendi, non ludibria spectrorum, non mali ullius periculum. Lucem jam accendit in mediis tenebris gratia DEI, quæ omnibus est salutaris. Epiphania nunc est



est sive Theophania perpétua, postquam ipsa lux apparuit hominibus, DEUS scil. jam ipse in carne nostrâ manifestatus. Litigent eruditi adhuc de festo Epiphaniarum, unde nomen acceperit, à stellâne, quæ Magis apparuit, an à baptismo CHRISTI, an verò à natali CHRISTI ejusq; aliis miraculis? Innotuerit etiam festum hoc post tria ferè demum secula, ita ut nec quarto, communi omnium consensu, satis constiterit, quo die feriæ ejus sint peragenda, aliis mensem Augustum, aliis sextum Januarii desinentibus in Ægypto potissimum atque omni oriente, aliis verò in occidente præcipuè sub Julio I. papâ pro d. XXV. Decembris pugnantis! Nobis tamen illa veritas semper relinquitur certissima atque immota, quâ DEI epiphaniam ad omnem salutem generis humani in carne nostrâ humanâ factam esse credimus, confitemur & lætamur. Atque nomen utique Epiphaniis fecit non stella Magorum, sed dies natalis ipsa DOMINI nostri JESU CHRISTI, testibus Nazianzeno, Epiphanio, & Isidoro Pelusiotâ. Recesserunt quidem ab hac vocis origine occidentales, transferentes eam sive in baptismum CHRISTI sive in stellam Magorum sive in alia CHRISTI miracula, id tamen vel eò consilio fecisse intelliguntur, ut quæ semel placuerat sententia de Natali CHRISTI d. 25. Decembr. celebranda, non tam facilè iterum defereretur, distinctis sic natalitiis CHRISTI ab Epiphaniis. Armenii interim, Græcis licet paulò post cum Romanâ Ecclesia consentientibus, consuetudinis suæ omnium tenacissimi fuerunt, neq; seculo XII alio die quàm sexto Januarii ferias hæc adhuc observantes. Nobis jam sufficiat, nosse ita natalē DOMINI, ut licet dies ille quis fuerit, ignorètur, ex omni tñ. nobis animo gratulemur, ipsum FILIUM DEI in societatem carnis humanæ nobiscum venisse, ne calamitas nostra nos planè à facie DEI averteret. Hujus rei causâ non vigilas, non ulla temporis partes jam prætermittamus, quibus ad hanc divinæ gratiæ agnitionem in nobis aliquam accessionem fieri posse existimamus. Non ergò committamus, *Cives optimi*, ut planè  
in



in omnibus, quæ ad religionem spectant, segniores esse videamur, rerum sic nostrarum circa salutem admodum securi. Surgamus tandem ex tam pernicioso ignavia veter. no. Concremari se potius patiebantur veteres Christiani in templo Nicomediæ, quàm ut curam religionis in die etiam natali DOMINI aut postponerent, aut deliciis suis corrumpere, sicut Diocletiani tempore idem accidisse ex Nicephoro intelligimus. Utinam & nos majori pietatis studio arderemus, quàm vulgò fieri videmus! In eam gloriam genus nostrum est translatum, in eam auctoritatem, ut si vel toti in admirationem omnem perpetuò effusi essemus, non tamen nisi primis, quod ajunt, labris rem attingere daretur. Videmus Carnem nostram in ipsâ personâ FILII DEI, quam omnes etiam Angeli adorare tenentur. Habemus talem Creatorem, qui ut Homo etiam ipse nobis creaturis suis jam benignissimè prospicit. Contigit nobis ille Salvator, ille Advocatus, ille iudex, qui ut in omnes partes essemus bono animò, similitudinem carnis nostræ æquali prorsus nobiscum ratione ipse secum in suâ hypostasi circumfert. Hanc, quæ in nos ipsos redundat, excellentiam, hanc prærogativam licet non satis animo complecti aut æstimare liceat, ita tamen proponere oportet, ut subinde in majorem gloriæ lucem transeamus. Jam penes vos ipsos esto iudicium, *Cives optimi*, annon in vigiliis etiam nocturnis occupari nunc quàm maximè fas esset, ut sic vel aliquantulum Angelorum studium imitemur, qui gloriam in excelsis DEO sub ipsum hujus festi ortum per noctem illustrè latâ voce in cælum usqve extulerunt. Equidem facile largior, rem liberam esse pietatem, quæ neque temporis certi neque loci rationem ita habere debet, ut inde suspendatur: Amor tamen DEI & Cura salutis nostræ id à nobis postulant, ut pietas, quæ aliàs est omnis temporis omnisqve loci, magis accendatur illis temporibus, quæ memoriam rerum circa salutem nostram gestarum præ aliis afferunt, atqve renovare debent. Inducamus ergò animum



mum pietatis eo fortius jam, quò majori lætitiâ cœsum  
propter nostram salutem resonuisse quondam novimus. Aut  
annon solis Angelis illas officii partes convenire putamus,  
ut, nobis ita securè viventibus, per noctem etiam laudes Dei  
enuncient? Euge conferamus & nostras voces, atq̃ve ani-  
mum ad illud studium, ut gloria DEI jam inter Christia-  
nos die nocteq̃ve continenter audiat. Et quemadmo-  
dum plures dies hisce feriis destinavit nostra consuetudo,  
quàm veterum, quippe qui uno modò die ita feriabantur,  
reliquis succedentibus memoriæ Martyris Stephani, Johan-  
nis Evangelistæ, & infantium ab Herode occisorum con-  
secratis: ita id operæ etiam demus enixiùs, ne in pietatis par-  
tibus inferiores unquam esse videamur antiquis tam reli-  
giosis. Stimulum in animis nostris figat atq̃; relinquat illud  
Pauli Tit. II. II. seq̃q̃. *Illuxit gratia illa DEI salutifera omnibus  
hominibus, erudiens nos, ut abnegata impietate & mundanis cu-  
piditatibus, sapienter & juste & piè vivamus in presenti seculo,  
expectantes beatam illam spem & illustrem illum adventum gloriæ  
magni illius Dei ac Servatoris nostri JESU CHRISTI, qui dedie  
semetipsum pro nobis, ut redimeret nos ab omni iniquitate atq̃; ex-  
purgaret sibi ipsi populum peculiarem, studiosum  
honorum operum.*

Valete!

P. P. Sub Sigillo Rectoratus  
Id. xxv. Decembr. A. 1696.

